



Nunatta inuiattut timersornikkut unammersuarterfissaanik qulisamik "National stadion"-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Pilersitsinissamut pilersaarummi misissorneqassapput unammersuarterfissap ingerlanneqarnerani sanaartornissamilu aningaasatigut pissutsit atuuttussat.

(Inatsisartunut Ilaasortaq Anders Olsen, Siumut)

Siullermeerneqarnera

Inatsisartunut ilaasortaq Anders Olsen aalajangiiffigisassamik siunnersuuteqarpoq nunatta inuiattut timersornikkut unammersuarterfissaanik qulisamik misissuisoqarnissaanik, tamannalu Partii Naleqqamiit oqaaseqarfigissavarput.

Nunatsinni timersornikkut periarfissanik pitsanngorsaajuartoqarnissaa Partii Naleqqamiit kissaatigalugulu soqutigisaraarput, pingaartumik timersornikkut periarfissaqarpallaanngitsut eqqarsaatigalugit.

Nunarput sorpassuartigut ineriartorpoq aamma timersornikkut, nunat eqqaamiugut qiviaraanni malunnartumik periarfissatigut timersorneq eqqarsaatigalugu siuarsimanerupput atortutigullu siuariartuinnavillutik, uagullu malinnaassagutta aamma atortutigut timersornikkut annertusaasariaqalerpugut.

Arsaattarfiit ivigaasanik qallikkat siunissami pinngitsoorsinnaajunnaariartorpagut, timersortarfiillu aserfallakkiartuinnartut aqqissuuttariaqalerlutik pinikuupput, aasilluasiit oqaluinnarluta tapersersuilluta, taava massakkut timitalimmik suliniarta oqaluinnarneq qatsunnarseqimmat.

Nunatsinni arsaattarnermi periarfissat pitsaanerpaajunngitsut oqaatigisariaqarput, ullumikkut nunani allani atugaasunut arsaattarfigut sanilliukkaanni atorsinnaanngitsutut taagaanni pitsaaneruvoq.

Pingaartumik arsaannermik unammersuarnerit nalaani pissartanngorniuttut pujoralaassuup ataani arsaattut, taamatullu timersortartutta atugaqarnerat tassa allanngortitariaqalerpoq.

Nunanut allanut kalaaleqatigut unammiartoraangata assut nuannaarlutalu malinnaasarpugut nunatta avammut takutinnissaa nuannaarutigalugu timersortartuttalu pikkorissut angusaqarluarnissaat isumalluarfigisarluugu nuannertaqaarlu angusarissaarlutik takutitsigaangata.

Angusarisatigut pitsanngorsaasoqassappat taava ullutsinnut naleqquttunik timersortartunut atugassarititaasut siuarsartariaqarput nunarput tamaat ataatsimut isigalugu. Timersortarfissuit ullumikkut annertunerpaamik timersornermi siursaaviupput ilaallu aserfallakkiartuinnarput immikkullu aningaasaaliisoqanngippat aamma eqquinerlussinnaallutik taakkunungalugu aamma isiginninnerput sakkortunerulersittariaqarparput.

Tassami taakkunani meerarpassuit timersornikkut siursaaffigineqartarput meeqqanut nuannaarutaasumik, peqqinnartumimmi inuuneqassagutta sunngiffimmi sammisassat aamma nukittuumik ingerlalluartaqarput.

Arsaattarfimmik ivigaarasalimmik anguniagaqartut Ilulissani assorujussuaq ingerlalluarput, suliniutit annertuut ingerlanneqalereerput tassuunalu ilungersuussillutik suliniuteqarneranni nersualaagassaapput.

Inuit namminneq kajumissutsiminnik Ilulissani suliniuteqarnerat Naalakkersuinikkut tapersorsorneqartariaqarpoq, utaqqiinnaratik ingerlapput, suliniullu siursimangaatsialersimavoq allaat aningaasaateqarfiit arlallit oqaloqatigineqareersimapput tapersersuinerlu annertusiartuinnarluni.

Taamaattumik arsaattarfimmik ivigaasanik qallikkanik sanasoqassappat sanaassaq siulleq Ilulissani sananeqassasoq inassutiginiarparput, tassami inuit namminneq kajumissutsiminnik sulinerat ullorialerneqartariaqarpoq, tamannalumi aamma allanut maligassiuneruvoq pingaartumik meeqqat inuusuttullu eqqarsaatigalugit.

Kiisalu ilanngullugu oqaatiginiarparput aamma ukiuunerani silami timersortartut sisorartartut aamma atugaat siuarsartariaqarluinnarput, pingaartumik sisorartartunut majuartaatit aqqusiuutillu eqqarsaatigalugit, tassami nunarsuarmiunut aamma angummanniassagutta ukiukkut apummi timersortartunut siursaasariaqarpugut, tassalu sisoraatiniq arpattartunut illiniliuutit aammalu sisorartarfinni majuartaatit malunnarmammi aamma taakkua amigaatigineqartut.

Qujanaqaarlu aamma utaqqiinnanngitsunik inoqarmat, Qaqortumi ivigaaraasanik arsaattarfiliorneq pissutaalluni suliniutit allani ingerlanneqalermata tassuunalu aamma Qaqortormiut nersualaagassaapput.

Maniitsumi aamma peqalerpoq nammineq pilersitaminnik ajunngeqaaq siuariartorpugut, aammalu Qeqertarsuarmi ajunngilluinnartumik arsaattartunut tunissuteqartoqarpoq tassalu Jens Salling torrallaavoq nersortarialimmik, Qeqertarsuarmiullu iluatsitsilluarnissaannik kissaappagut.

Taamaattumik unammersuarterfissamik misissuinissamik aalajangiiffigisassamik siunnersuut Inatsisartunut ilaasortamit Anders Olsen Siumut saqqummiunneqartoq Partii Naleqqamiit taperserparput.